

Ruski ministar
spoljnih poslova
dolazi u BiH

IGOR IVANOV 10. SEPTEMBRA U SARAJEVU

SARAJEVO - Ruski ministar spoljnih poslova Igor Ivanov doputovaće 10. septembra u jednodnevnu posjetu BiH, potvrđeno je u petak iz ruske ambasade u Sarajevu.

Predviđeno je da se Ivanov u Sarajevu sastane s članovima Predsjedništva BiH, predsjedavajućim Savjeta ministara BiH Adnanom Terzićem, visokim predstavnikom Pedijem Ešdaunom, te ministrom spoljnih poslova BiH Mladenom Ivanićem.

Ruska strana očekuje da će teme razgovora biti ukupna saradnja BiH i Rusije, neka ekonomska pitanja i situacija u BiH. Inače, u ruskoj ambasadi ističu da Rusija svoje odnose sa BiH ocjenjuje veoma dobrim i prijateljskim, uz puno međusobno razumijevanje. (Fena)

EU naredne godine
preuzima rukovođenje
međunarodnim
snagama u BiH

EVROPA TRAŽI SFOR, SAD REZERVISANE

STRAZBUR - Ministri odbrane Francuske i Njemačke Peter Štruk i Mišel Alio-Mari izjavili su u petak da bi Evropska unija trebalo da ubrza pripreme da iduće godine preuzme od NATO-a vođenje međunarodnih snaga u Bosni i Hercegovini, bez obzira na rezervisani stav SAD-a.

Poslije sastanka u Strazburu, Štruk je ocijenio da će EU "preuzeti mandat u Bosni naredne godine". Alio-Mari je kazala da je cilj EU da do sredine 2004. godine preuzme rukovođenje SFOR-om, koje sada predvodi NATO.

Francuska, Njemačka i ostale zemlje EU vide rukovođenje mirovnim misijom od 12 hiljada vojnika kao glavni test svojih ambicija za jačanje odbrambene politike Evrope i stvaranje zajedničkih vojnih snaga. Međutim, zvaničnici SAD-a smatraju da BiH prevazilazi mogućnosti nove vojske EU. Prema njihovom mišljenju, ona će biti suočena sa prevelikim izazovima kao što su organizovani kriminal koji je u porastu, moguće međunarodne terorističke aktivnosti i potreba da se uhvate osumnjičeni za ratne zločine kao što su bivši lideri bosanskih Srba Radovan Karadžić i Ratko Mladić, koje NATO već nekoliko godina pokušava da uhapsi. Promjena zahtijeva odobrenje svih 19 članica NATO-a, uključujući i SAD, kao i bosanskih vlasti. (Beta)

Volfgang Petrič, bivši visoki predstavnik međunarodne zajednice za BiH

Politička situacija u Bosni i Hercegovini nije dobra



Volfgang Petrič

NN FOTO

PROTOKOL

Na poziv Foruma demokratske alternative BiH, mreže nevladinih organizacija iz BiH, Volfgang Petrič boravi u privatnoj posjeti BiH.

Osim sa predsjednikom Foruma Sejfudinom Tokićem, Petrič se u petak sastao i sa aktuelnim visokim predstavnikom Pedijem Ešdaunom.

Nije propustio priliku istaći važnost nevladinog sektora poručujući da lokalni autoriteti preuzmu vlast i odgovornost za procese u BiH. "Istorijski govoreći, ovo uplitanje međunarodne zajednice u razvoj situacije u BiH je svojevrсни eksperiment i veoma sam zainteresovan da on bude uspješno dovršen", rekao je Petrič.

On je u petak uveče na panel-diskusiji o preuzimanju odgovornosti za procese u BiH, razgovarao sa predstavnicima nevladinog sektora u BiH: Srđanom Dizdarevićem, Sveborom Dizdarevićem, Žarkom Papićem, Miodragom Živanovićem...

Kao najveći lični uspjeh smatram odluku iz novembra 1999. kada sam u jednom danu smijenio 20 političara koji su opstruirali povratak i kada sam nametnuo imovinske zakone. Smatram da je ta odluka snažno "pogurala" proces povratka u BiH

Bivši predstavnik u BiH Volfgang Petrič, nije zadovoljan političkom atmosferom u našoj zemlji.

Ocjenjuje da je ona logična posljedica rezultata posljednjih izbora na kojima su pobijedile nacionalne stranke.

Petrič, koji je BiH napustio oktobra 2002. godine, priznaje da je iznenađen pobjedom nacionalnih stranaka. Ipak, smatra da se volja narodna mora poštovati. Petrič odbija komentarisati politiku svog nasljednika Pedija Ešdauna.

NN: Kazali ste da gotovo svaki dan pročitate nešto o BiH. Kako komentarišete aktuelnu situaciju u našoj zemlji?

PETRIČ: Razumijem frustriranost ljudi u BiH zbog nedovoljne brzine promjena i ekonomskog razvoja. Jako pažljivo, sa velikim entuzijazmom, pratim sve iz BiH. U mojoj kući u Ženevi govorimo bosanski jer moj sin Nikola govori bosanski i razgovor o BiH i jezik BiH su sastavni dio mog svakodnevnog života. Aktuelna situacija u ovoj zemlji je razlog da ja smatram da građani BiH moraju biti aktivniji, da oni moraju dati impuls za promjene, pogurati promjene u BiH naprijed. Sljedeće godine Slovenija ulazi u EU i ostaje pitanje kako to da ostatak bivše Jugoslavije još nije spreman za taj ulazak. Smatram da se tu ne radi o ljudima, nego o politici.

NN: Šta onda preporučujete političarima u BiH?

PETRIČ: To je ono što sam ja stalno govorio dok sam bio ovdje: političari moraju ljude u BiH i njihove želje uzeti ozbiljnije, mora da postoji ozbiljan ekonomski i socijalni program.

NN: S ove vremenske distance, šta su bili Vaši najveći uspjeh i najveća greška tokom Vašeg mandata?

PETRIČ: Mnogo grešaka i poneki uspjeh! Jedan od uspjeha je činjenica da ova zemlja sve više liči na normalnu zemlju, posebno kada je riječ o povratku izbjeglica i raseljenih lica, ali i činjenica da

se građani BiH lakše i slobodnije kreću unutar zemlje i to što sve veći broj građana cijele BiH ovu zemlju istinski doživljava kao svoju. Kao najveći lični uspjeh smatram odluku iz novembra 1999. kada sam u jednom danu smijenio 20 političara koji su opstruirali povratak i kada sam nametnuo imovinske zakone. Smatram da je ta odluka snažno "pogurala" proces povratka u BiH. Jedan od uspjeha je i sporazum na Mrakovici koji je rezultirao izmjenama Ustava u BiH. To smatram uspjehom najviše zbog metoda koje su upotrijebljene da se dode do tog sporazuma - preuzimanje odgovornosti i partnerstvo. S druge strane, neprikladost bh. školstva i univerziteta evropskim standardima smatram poražavajućim i mislim da je tu međunarodna zajednica mogla učiniti nešto više.

NN: Posljednjih dana BiH potresa afera sa prisluškivanjem i mogućim zloupotrebama sigurnosnih službi, zakona o njima i ovlasti djelatnika tih službi. Da li ste upoznat i kako to komentarišete?

PETRIČ: Nešto o tome sam naučio, nešto pročitao i razumjeću da nije moje da to komentarišem, ali mislim da politička atmosfera u ovoj zemlji nije baš najbolja.

NN: Imate li na osnovu toga preporuku ili savjet i građanima i političarima?

PETRIČ: Kada pogledam unatrag, ovdje je napravljen veliki uspjeh, ali ja još nisam zadovoljan progresom koji je napravljen u ovoj zemlji.

NN: Da li je možda ova trenutna politička situacija posljedica izbornih rezultata ili nečeg drugog?

PETRIČ: Naravno da je ovo posljedica izbornih rezultata, ali u isto vrijeme i ne sasvim dobre politike prošlih političkih struktura u ovoj zemlji.

R. ČENGIĆ

Opljačkana Filijala Razvojne banke u Sokocu

Maskirani razbojnici ukrali 20.000 KM

SOKOLAC - Maskirani pljačkaši u petak ujutro ukrali su oko 20.000 KM iz Filijale Razvojne banke jugoistočne Evrope, koja se nalazi u Sokocu, javili su iz Centra javne bezbjednosti Srpsko Sarajevo.

"Pljačkaši su bili naoružani automatskom puškom kalašnjikov i pištoljem. Nakon što su opljačkali banku udaljili se golfom 2. Policija intenzivno radi na identifikaciji i

privedenju počinitelja", kazala je Dragana Đokanović iz Službe za odnose s javnošću CJB Srpsko Sarajevo.

Đokanovićeva nije htjela da komentariše koliko će sigurnosne kamere postavljene u banci pomoći pri identifikaciji pljačkaša.

Šef Filijale banke u Sokocu Simo Đurković kaže da je šteta mogla biti mnogo veća.

"Čim su ušli u banku, pljačkaši

sa 'fantomkama' na glavi naredili su svima da legnu na pod. Tražili su od osoblja da otvore glavni sef, ali pošto to niko iz banke nije mogao učiniti, jer niko nema ključ od sefa, pljačkaši su se zadovoljili sa oko 20.000 KM koje su se nalazile na šalterima banke", rekao je Đurković.

On je dodao kako, osim preživljenog šoka, niko od radnika niti od stranaka koje su u vrijeme plja-

čke bile u banci nije povrijeđen.

Nakon što su odnijeli novac pljačkaši su se udaljili u golfu zatamnjenih stakala, registarskih oznaka 340-E-890.

"Međutim, to policiji nije bilo od pomoći, jer su tablice ukradene", kazao je Simo Đurković.

Tačnost ove informacije nisu mogli komentarisati u CJB Srpsko Sarajevo, jer je "istraga u toku".

D.Mu.